

Arkitekto di MFA Noord, Orlando Hoevertsz:

“Edificio ta un homenahe na piscadonan di Noord, cu hopi servicio y facil pa yega”



ORANJESTAD – Arkitekto tras di diseño y ehecucion di edificio di MFA na Noord, Orlando Hoevertsz ta considera cu e proyecto a cana di un manera fantastico. Dialuna ultimo el a ricibi e yabinan for di contratista pa entrega nan na SOGA cual na su luga a presenta nan na Gobierno. Tur esunnan involvi a traha bon cu otro y a percursa pa e construccion a cana un caminda sin mucho complicacion.

Hoevertsz a gradici e comunicacion y sosten cu a sostene cu miembronan di MFA como tambe companianan involvi, esta Bohama, Croon y RoTech. “Full e proceso a cana hopi smooth. Mi ta felicita tur compania pa nan bon input den full e proyecto aki.” E resultado ta un edificio segun e vision di Gobierno caminda varios instancia por traha banda di otro pero sin hinca nan den hoki. E interior di e edificio multifuncional na Noord tin espacionan cu ta habri y ‘vloei’ di un pa e otro. Un ehempel di esaki ta e trapi cu ta ocupa e enfoko principal for di momento cu ta drenta e Facilidat Multifuncional. “E ta conecta e parti ariba y abou hopi estimulando lo mas posibel e movicion cu e tribune na banda y su dilanti un podium,” asina e arkitekto a splica. Ora cu e podium no ta den uzo pa un



actividad, e ta sirbi pa pone mesa pa e cafeteria. “Tur cos ta wordo uza den mas cu un funcion,” el a añadi.

Edificio fresco

Tambe a indica cu a purba diseña un edificio special pa e pueblo di Noord. Despues cu den e fasenan inicial di e proyecto di MFA a consulta cu habitantenan riba kico nan tin mester y con nan ta desea pa e edificio muestra, a pinta loko ta un homenahe pa e piscadonan di Noord di antes. Arkitekto Hoevertsz a splica cu parti e vloer ta blauw manera lama, mientras cu otro ta color di santo di Aruba. Tambe a uza hopi palo manera esun pa construi boto, pero tur esaki ta presenta na un manera sutil. “Pueblo di Noord ta hayando

un bon edificio akinan cu hopi servicio den centro di Noord y hopi facil pa yega na dje,” e arkitekto a comenta. Otro aspectonan importante di e edificio ta su conexion cu e parti pafu haciendo uzo di bentanan pa haci e salanan di reunion mas agradabel, un dak cu ta laga biento pasa loko ta mantene e edificio mas fresco, instalacion di panel solar riba e dak pa e genera su mesun coriente y tambe un lift teniendo na cuenta cu personanan cu limitacion fisico.

Algo positivo pa noord

Director di e oficina, esta Anky Vrolijk, personalmente a supervisa henter e proceso di diseño y construccion ya pa mas cu un año. Semanalmente a sinta cu arkitekto y

contratista pa percursa cu tur cos ta bayendo manera mester ta y cu ta haci e ahustenan necesario na fabor di e miho operacion di e proyecto.

“Awo ta cuminsa e responsabilidad di ehecucion tur e trabounan di un manera mas efectivo compara cu pasado,” asina Vrolijk a indica. Hunto cu Gerente di MFA Richard Tromp y asistent Chris Figueroa, ta bay over na loko ta e preparacion di e parti paden cu ta inclui ubicacion di mueblenan, maneho di cantina y mudanza di cada servicio cu lo ta presente den e Facilidat Multifuncional.

Durante e proximo luna, ademas di ekiponan cu mester bin paden, Elmar ta bay haci instalacion di panelnan

solar riba dak pa asina e edificio bira sostenibel pa loko ta trata energia. Rond di dje, Santa Rosa ta dunando un man pa loko ta trata e landscaping cu den futuro ta percursa pa matanan di sombra caminda hendenan por sinta bou di dje.

Invita pueblo

Sra. Vrolijk a priminti cu pa apertura ta bay organisa un evento den cual pueblo di Noord lo ta e invitado mas importante. “Nan por bin conoce e edificio y su servicionan,” el a indica. Lo ta un dia pa celebra hunto cu e habitantenan, miembronan di e team y figuranan clave di e barío. Tur detayenan relaciona cu e apertura lo ta anuncia previamente den prensa. Pa e directiva di MFA ta importante pa e barío sa cu awo nan ta conta cu un luga caminda por reuni y desaroya idea y actividadnan social y cultural.

Por ultimo e director di MFA a gradici tur esunnan involvi den e proceso te aworaki cu a tuma e edificio di manera oficial. El a menciona SOGA na prome instante como esun cu a coordina e parti di financiamiento, na contratista Bohama Aruba, na arkitekto Orlando Hoevertsz, tur trahado, tambe Santa Rosa, WEB y Elmar cu tin un trabou nan dilanti. “Danki pa yuda realisa e proyecto aki cu ta bay bira algo positivo pa e pueblo di Noord,” el a indica. □